

四庫全書

集部

欽定四庫全書

毘陵集卷十

唐 獨孤及 撰

靈表 一首

唐故朝散大夫潁川郡長史贈祕書監河南獨

孤公靈表

墓誌上 七首

唐故潁川郡長史贈祕書監獨孤公第三子愷

墓誌

唐故浙江東道節度掌書記越州剡縣主簿獨

孤丕墓誌

唐故潁川郡長史贈祕書監獨孤公第六子萬

墓誌

唐故亳州刺史鄭公故夫人河南獨孤氏墓版

文

前左驍衛兵曹參軍獨孤公故夫人韋氏墓誌

殤子韋八墓誌

唐故大理寺少卿兼侍御史河南獨孤府君墓

誌銘

并序

靈表

唐故朝散大夫潁川郡長史贈祕書監河南獨

孤公靈表

公諱某其先劉氏出自漢世祖光武皇帝之裔世祖生
沛獻王輔輔生釐釐生定定生節王巧巧生長子廣嗣王

位次子廩仕漢為洛陽令廩生穆穆生進伯為度遼將軍擊匈奴兵少援不至戰敗為單于所獲遷居獨孤山下生尸利單于加以谷蠡王之位號獨孤部尸利生烏和和生二子長曰去卑為右賢王建安中獻帝自長安東歸有李傕郭汜之亂右賢王率其部衛車駕還洛遂徙遷許復歸國卒次弟猛代立生嗣論富論嗣論生路孤路孤生眷眷生羅辰從魏文帝遷都洛陽遂為司州洛陽人始以獨孤其部為氏用征伐賜爵永安公位征

東將軍定州刺史征東生萬齡官至廷尉謚曰貞廷尉
生稽字延平善左右射學窮金匱之典魏世祖初從平
滑臺以功授散騎常侍厯守冀定相三州時新定律令
慎選廷尉徵公拜焉再世為法官俱以廉平不苛顯名
當時榮之加鎮東將軍薨謚曰文鎮東生歸辯聰而才
又為鎮東薨贈太尉太尉生冀字希顏以博學侍講東
宮厯安南將軍定州刺史贈司徒司徒生永業以文武
兼備佐齊王入洛定鄴都督幽洛二州由行臺尚書令

陞司徒封臨川郡王語在齊史臨川王生子佳在齊為
勁弩將軍在周為儀同三司在隋守清遠鎮握節死難
贈并州刺史并州生義順武德中厯民部侍郎尚書左
丞光祿大夫封洛南郡公洛南生左千牛備身諱元慶
公之祖也千牛生朝散大夫定州長史諱思陳公之父
也二十三葉之德善鍾其人於公公剛方廉清貞信弘
寬德厚性和與四時氣侔非天下直道不行非先王之
法言未嘗言當出處去就之間非抑與不苟求與朋友

交非同道不苟合至守王事臨大節非其正雖臨大兵
不懼恪德危行居易中立不可得而親不可得而疎讀
書觀忠孝大畧不索隱蹟屬詞止乎禮義不止詠情性
而已太極元年詔舉文可以經邦國者宣勞使源乾曜
以公充賦時對策者數百人公與滎陽鄭少微特冠科
首起家拜同州郃陽縣尉歲滿授好畤縣尉開元十四
年玄宗初登封泰山注意二千石令長以煦嫗下民授
公益州溫江令公治縣如治家明不至察威不至猛去

煩苛繳繞之政施德信刑禮以訓齊之溫江人飲公之
化逋者復疲者悅善者勸不善者知恥益州刺史張敬
忠以狀聞詔授監察御史轉殿中侍御史會權臣惡直
斥去不附已者貶公廬州長史明年惡直者罷位公稍
移武功令未到官病免二十三年除寧州司馬二十八
年遷潁川郡長史初公為御史嘗以直忤吏部侍郎李
林甫至是林甫當國常欲騁憾於我而五府三署每有
高選羣公皆昌言稱公全才且各以臧文竊位自引由

是免咎然十年再遷位不離郡佐或勸公卑其道可以
取容於世公曰可卑非道也屈伸天也非人也人如予
何天寶元年加朝散大夫二年七月七日寢疾終于位
春秋五十七位不尊壽不遐志不行善不報其直虛語
守道者相弔以為痛是歲八月殯于郡東至德二年歲
次癸酉十月十有四日權遷窆于洛陽龍門山西岡大
厯四年五月十三日詔贈秘書監命卿之位錫于身後
嗚呼哀哉夫人河南洛陽人也薛國長孫覽之玄孫咸

陽縣丞諱頤府君之女左金吾將軍諱子哲府君之妹
稟天元和生知孝慈含德之厚與坤體合執筭助祭四
十餘載人莫見夫人喜怒之容躬歡順承動協禮經宗
族以睦長幼以序無言無為化成于家公之加命服也
夫人封封丘縣君汜等既孤夫人棄采蘋之度修釋氏
教受正觀法于長老比丘尼上方服勤一年得四念處
三昧視去諸結猶棄涕唾至德二年隨子東征明年歲
在甲戌七月二十四日終于會稽享壽六十有四八月

某日權殯于雷門之南汜巨及正等遭天不弔無恃無
怙以世故坎壈不克遷祔者十一年矣欲報顧復天胡
有極今年問宅兆于前都水使者張係係卜甘泉東伊
水西甘泉鄉之原吉謹以歲次己酉秋七月壬午遷公
夫人靈坐合厝于此原猶懼陵谷世人之不明我期也
故不敢不志收血勒石以遺後嗣

墓誌

唐故潁川郡長史贈祕書監獨孤公第三子愷

墓誌

唐天寶元年歲次壬午潁川郡長史府君第三子曰愷
寢疾卒于潁川至德二載冬十月四日權窆于洛陽龍
門西山大厯四年五月十二日詔追贈潁川府君祕書
監是歲七月壬午遷宅兆于壽安甘泉鄉之原以君之
喪葬于塋之左禮也君沈毅果斷聰敏好學弱歲專左
氏春秋工于畫尤善音律圖書之興靡不深究性倜儻
達節不欲以細行竊名志氣方遠未仕不幸多病年纔

二十二而歿修短之經聖人罕論同塵顏冉茹恨何言
嗚呼

唐故浙江東道節度掌書記越州剡縣主簿獨
孤丕墓誌

皇唐故潁川郡長史贈祕書監河南獨孤公遷宅兆于
壽安縣甘泉鄉之原公第五子丕陪葬于塋之西序第
三兄愷墳在右第六弟萬墳在左三穴齊列如平生侍
立之序禮也丕字山甫少聰明有志操好學博古年十

五能屬文祖述典謨實而不華有古人風采至若探綜圖緯推步六甲昊天厯象太乙之奧悉究其趣尤好黃老道與脉藏榮衛之數奉之以為衛生之經每餌藥鍊氣謂丹砂可學乾元二年從季父峻為御史中丞都督江東軍事盛選僚佐表為剡縣主簿軍書羽檄悉以諮訪觀其志氣遙遠冲然有騁長途致青雲之勢不幸短命卧疾累旬卒於會稽春秋纔二十三位不過部從事其弘識明略真氣妙用藏于身而未形也世無得而稱

之矣嗚呼哀哉是歲乾元三年歲在己亥秋九月也臨
歿歎曰孝道以冀全真策名期于顯親未中道二志俱
棄命也夫是月也殯于雷門之南先夫人壽宮之傍行
已十年反葬此宮無兒可以主祭悲孰甚焉故月而日
之以備朽壤洒淚紀德哀罔有極

唐故潁川郡長史贈祕書監獨孤公第六子萬
墓誌

萬潁川長史府君第六子性專靜內敏有幹局多才藝

嗜學好古誦老聃莊周之書究其大略罹于多難未遑
筮仕乾元三年夏六月與昆弟同侍板輿將如吳遇疾
歿于楚州春秋二十九七月殯于廣陵山光南之西大
厯四年五月詔贈潁川府君祕書監是歲七月壬午奉
遷神座祔于壽安縣甘泉鄉之原先是萬之喪至自廣
陵是日陪葬于塋西隅禮也夫惟天壽之數雖聖智所
無奈何今刻石志美冀其名之悠久也

唐故亳州刺史鄭公故夫人河南獨孤氏墓板

文

夫人河南洛陽人也其先劉氏出自沛獻王輔其裔孫
因山命氏中復劉自獻王十九世至齊行臺尚書令永
業始復為獨孤氏自臨川至潁川郡長史府君六葉明
德道炳於世夫人潁川府君長女性聰略有志尚寬仁
慈順加以以明柔而不惑儉必中禮歸鄭氏生二男二
女而寡男始孩女未齔鞠而育之導之義方長男曰季
華次男曰子華既長皆敦閱詩禮被服文行時人稱夫

人善誘善教乾元三年因洛陽再擾隨子北征永泰二年某月終于鉅鹿郡享年若干嗚呼仁柔宜壽慈儉宜福二者反是為善者惑焉初夫人少因有行思歸寧而不得晚值多故去邦族而無復由是終身有遠父母兄弟之痛焉臨終顧謂其子葬我必於先夫人之壠季華等泣奉遺旨大厯三年歲在戊申以夫人之喪至自鉅鹿冬十一月庚寅及葬洛陽龍門潁川府君塋兆之側夫人之志也及敢書伯姊之德銘諸墓石云

前左驍衛兵曹參軍河南獨孤公故夫人京兆

韋氏墓誌

夫人諱某字某楚王交傳孟裔孫唐許州司馬皎曾孫
渭南縣主簿懿之孫兗州金鄉縣尉商伯季女祕書省
著作郎偉睦州刺史儋之妹其先自彭城郡徙京兆從
丞相賢後九世至本州大中正穆有東西眷之號二十
三世至徵士曼居魏周二代出不降志處不隨俗時人
號為逍遙公夫人之七世祖也逍遙公生民部尚書建

安公世恭建安生上大將軍宋州刺史仁祚將軍生給事中旅即許州之禍也夫以四言之遺直一經之餘烈十徵之高風焯于古今宜其秉哲垂懿百代不隕地之華望之崇與春秋之唐杜范氏漢晉之袁楊王謝侔其熾大矣哉二十八葉之明德茂祉降衷于夫人故孝慈貞儉溫惠淑慎文敏好禮三者皆天機生知不待師訓而至廣德二年夏六月歸于我衣服飲食躬自菲薄夙夜戒敬致孝于苻某接娣姒以謙馭幼賤以敬敦善勸

義恕不知而矜不能喜恕未嘗見于容止也其德禮所
化宗族以睦兒童知讓生一子四歲而歿大厯四年夏
六月癸丑再孕不育乙卯歿于舒州春秋若干仁厚而
不福德備而不壽是天不惠于我家也向使錫厥永年
正家承筐宜爾子孫百禄是享非夫人曷歸啟手足之
日長幼號咷外姻內姻親疎皆行哭失聲也宜哉是歲
九月甲申以精裱裳帷遷于洛陽十一月丁酉安宅兆
于舅姑先塋之西南隅恐時逝事遷景行不貽于後故

刻石以志卒葬且謹而日之

殤子韋八墓誌

殤子河南獨孤氏小字韋八以其弱而未名也故以字
稱北齊司徒行臺尚書令臨川郡王七代孫左驍衛兵
曹叅軍公之元子祕書省著作郎京兆韋儼之甥生有
奇表溫明聰秀覃訏于保姆傳婢之手嶷然異于凡童
氣閑體和取予必時諸父諸姑每謂興我家者必此兒
也賓客之至者看玉人不暇倘假以壽命則成器致位

未易度也不幸多病大厯六年歲次辛丑十二月二十
二日歿于舒州壽止五歲三十甲子長幼惋毒六姻悼
惜嗚呼天將不昌吾後裔乎不然曷使此孩不至於成
歟大厯八年夏四月十六日以其喪歸葬于洛陽祔于
王父母宅兆之側其仲父銜涕書其始終紀于墓云

唐故大理少卿兼侍御史河南獨孤府君墓誌

銘
并序

府君諱嶼河南洛陽人漢世祖光武皇帝第二子沛獻

王輔之昭也齊臨川郡王河陽道行臺僕射洛州刺史
永業府君五代孫國朝明威將軍文惠府君第二子越
州都督浙江東道節度觀察處置使兼御史中丞左金
吾大將軍峻府君之季弟也聰明仁恕專直寬信擾而
毅溫而屬弱冠筮仕以藝即戎藏器安卑非其志也天
寶十四載安祿山反朝廷以淮肥海沂三吳咽喉宜擇
良佐以貳藩鎮命府君為泗州長史無何換滁濠二州
倅戎備叅吏職忠敏肅給所莅繫賴御史中丞崔公昭

之尹河南也盛選僚佐表府君為太常丞兼殿中侍御史營田判官使罷轉湖州別駕大厯五年崔公受詔持節牧宣歙池三州府君復為從事以太子右諭德兼殿中侍御史遷大理少卿兼御史謂方宜民宜人祿與壽俱遭命不淑春秋五十五而歿是歲大厯九年春三月二十四日夫人隴西李氏以柏舟之誓提攜諸孤某等奉府君之喪言歸洛陽某月日窆于某原禮也府君少孤事兄嫂以友悌稱在家在邦言信行果居官祇事強

志能力及其冠法冠佐太府上以勤恪周爰成務下以
明誠勞謙應物和禮正家敦睦族姻自疎及親必慈必
愛而命不我與年未下壽天其夭拯嗚呼哀哉初府君
之金吾伯兄擁旄浙東也拔崔公于羣吏之中外為軍
司馬推誠委政之分猶晉得韓厥宋得子罕及中丞之
開府辟掾府君為首既而府君之喪也中丞哭之慟贈
賻賙給加于人一等由是稚子孀妻得奉喪而西三月
而葬禮無違者賻布之餘足備祭器君子謂金吾之明

哲貽厥兄弟宣州之交情見于死生知己之道斯其行者鮮矣及敢不以直詞書仲父之美于墓石其辭曰

叔父懿德承家令儀惠迪哲兄踐修靡違移治于官發跡淮沂及佐皇華赤繡其衣天子命我再叅軍機駱馬驪驪所從其誰顯允君子為諸侯師府君委質咨諏載馳式壯其猷耄未及之陰陽為寇子鵬洽期昔也陟岡哀哀永思今也反真匪公曷依伯兮叔兮今乎已而他年九原公誰與歸



毘陵集卷十

欽定四庫全書

集部

毘陵集卷十一
三

詳校官太常寺少卿臣陳桂森

檢討臣何思鈞覆勘

總校官降調編修臣倉聖脉

校對官編修臣朱攸

謄錄監生臣謝仁

欽定四庫全書

毘陵集卷十一

唐 獨孤及 撰

墓誌墓表中

九首

唐故正議大夫右散騎常侍贈禮部尚書李公

墓誌銘

并序

唐故秘書監贈禮部尚書姚公墓誌銘

并序

唐故特進太子少保鄭國李公墓誌銘

并序

唐故朝散大夫中書舍人秘書少監頓丘李公

墓誌銘

唐故給事中贈吏部侍郎蕭公墓誌銘

并序

唐故銀青光祿大夫太子右庶子嚴公墓誌銘

并序

唐故尚書庫部郎中滎陽鄭公墓誌銘

并序

唐故吏部郎中贈給事中韋公墓誌銘

并序

唐故河南府法曹參軍張公墓表

墓誌墓表

唐故正議大夫右散騎常侍贈禮部尚書李公

墓誌銘 并序

歲在丁未七月丁卯有唐故右散騎常侍李季卿薨享年五十九文經邦國行滿天下無人非鬼責之悔以遺後艱無中人十金之產以補祭於身沒顧謂宗子家老必以布車一乘斂手足形還葬其孤馮翊縣令霸等泣奉遺命以某月庚寅附宅於長安九陂原之先塋名公

上士護喪會葬同道必至哀纏都邑初公烈考曰適神
龍中歷官中書舍人昭文館學士工部侍郎才高而明
為文章著龜公生而好學地使然也豁然閱達天所縱
也臨大節而賈勇不私其身也進賢不進不止事君以
忠也當昔天步方艱王師有征公入參諫臣出佐軍政
直躬咨諏戎臣賴之其後領二曹判二州再司王言三
載京尹由秘書少監為吏部侍郎復兼御史大夫慰撫
山東淮南明年勞旋典選如故大歷三年拜右常侍其

勤王家十有餘年舉措由道行止以直居貞守忠愆不
能惑思賢求才若渴若飢推心吐誠親疏以之執德之
經不為利回正進退於忠信視得喪如漚涕凡君子在
位則不仁者遠攸徂之邦宜皆蒙福遽奪公算是不惠
於斯人也天難忱斯嗚呼哀哉諸公以為不可奈何者
壽夭之數若奮揚景行宜在知已由是尚書右丞長樂
賈至作銘曰

於維李公誕靈中和磊落瓌奇如山如河胷中洞開萬

里長波孝友忠信詩之無邪早歲登科以文從吏累擢
大邑拔乎其萃時之方難朝慎名器帝曰忠謹爾居諫
議出典方岳入趨禮闈再掌絲綸翱翔鳳池乃作天官
又侍紫微奉使澄清功濟危時諤諤正言有犯無隱詎
諧善謔託諷脣吻雲衢未窮陰霜夙實悽愴東川古來
共盡人懷遺愛帝念謀猷褒贈春官悲感林丘已矣平
生哀哉若浮獨有令名與天悠悠

唐故秘書監贈禮部尚書姚公墓誌銘

并序

有唐秘書監永安縣侯姚公諱子彥字伯英其先馮翊
蓮勺人也至高祖僧洪徙家河東祖思聰秘書少監父
坦汝州梁縣丞贈秘書監公忠諒孝愛寬仁愿恭質方氣
沖天所授也而力行博學溫故知新錯綜六藝公作詞
賦初舉進士又舉詞藻皆陞甲科尉清苑獲嘉永寧三
縣開元二十九年詔立黃老學親問奧義對策者五百
餘人公與今相國河南元公載及廣平宋少員等十人
以條奏精辯才冠等列授右拾遺內供奉厯左補闕於

時選多士命百官先文行而後名法而柱下方書南宮
章奏主張綸翰典司禮文尤精其選非盛名莫居繇是
遷公殿中侍御史禮部員外郎禮部郎中知制誥中書
舍人太常少卿天寶十四載奉詔宣慰江東淮南覽觀
風俗無何二京陷覆太夫人捐館公外罹憂患內纏惻
疚銜憤泣血毀隣滅性乘輿反正公適外除拜太子右
庶子於時逆難始康百揆草創官復其職人亦求舊俄
又授中公舍人禮部侍郎光祿卿左散騎常侍加銀

青光祿大夫復知制誥廣德二年授秘書監以儒行懿
德策名三朝遺跡故事周遍臺閣資忠體和唯道是居
正身奉上中立不倚恐懼戒慎形於隱微故遭值傾否
出入夷險而未嘗有悔名與身偕德善是依明哲以保
故也享壽七十有八大歷三年四月某日薨於位五月
之某日詔贈禮部尚書知言者以為壽富康寧攸好德
考終命洪範謂之嚮用五福而公居四焉以清儉貽厥
子孫故所不至者富焉爾非明德介祉何以享茲有子

曰驍曰驥曰驂曰駟曰驢號於旻天痛欲報之罔極也
銜恤問禮收血裏事十月丁酉卜兆北原惟盛德與公
器若川流之無還垂芳如之何刻銘墓門其詞云

恂恂秘書蘊粹含和服膺孔門行隣四科遭時之康天
下尚文公奮羽翰翱翔慶雲晚逢中興貴德尚齒公秉
懿範入作卿士逮事三后出入二紀典禮司書媚于天
子居貞保儉與祿終始鬱鬱佳城烈烈餘美日月有逝
令聞無已

唐故特進太子少保鄭國李公墓誌銘

并序

少保諱遵皇唐太祖景帝七世孫也祖瑜鄭州刺史追
贈太常卿烈考曰暈官至太僕贈太子太師揚州都督
公聰朗奇偉豪邁曠達率性忠孝臨節有勇開元十年
初仕天寶六載出守始於淄川厯濟南汝南以剛明莅
衆所居政肅民受其賜生為立祠十四年秋九月由執
金吾為彭原郡守明年長安覆沒玄宗遜於南京便橋
之役我師敗績自新平屬之五原二十石皆反為賊守

肅宗以餘騎十數次於彭原公頓首迎謁且憤且喜因獻衣服鞍馬泣問大計乃悉發倉庫募敢死士獲九百人公自誓衆扈蹕而北翼日師次臨涇又北至於平原收攜貳逆命者斬之以殉破其餘黨進幸靈武旬日衆至數萬王師遂張於時法駕播越神器無主公與裴冕等率羣臣勸進陳天意上尊號上即皇帝位拜公尚書工部侍郎領宗正卿乘輿南旋公封鄭伯舊京始復公典營建社稷宗廟園陵壇墀罔不畢修百工咸若乾元

二年論功行封策為鄭國公定食實封二百戶加特進
工部尚書宗正如故上每拜公相命將帥建妃后公悉
參焉渥澤滂沱羔鴈盈門家有陸生之橐樂兼魏絳之
賜中興宗臣倚寵無二會李輔國泄省中語且諷公卿
舉已為相公不從密陳其姦明年肅宗崩公由太子少
傅貶袁州刺史竟為盜憎且讒勝故也寶應二年拜鴻
臚尋復加太子少保貶永州司馬大厯二年七月某日
薨於永州春秋若干夫人盧氏蘄春郡長史諱之子以

副筭宜室封范陽郡夫人而偕老憊願先公十二歲而
歿大厯三年夏五月庚申合葬于萬安山北原禮也惟
公宣力殷憂之際克扶艱難之業忘身衛上忠之至者
及居職任事知無不為永泰之後以列侯朝請則放志
達生以親其身再處左官皆非其罪知公者謂公進因
策勲退不附邪善無近名直而忘懷斯可謂之達矣有
四子謂誦諍諤願書其先人之勲烈使後嗣得約而觀
之於是公母弟祕書少監日勲謂及忝佐典三禮宜知

先王先公之昭穆故命為誌其辭曰

貞松之姿匪寒不知公之清規見於國危抗憤忠勤發
民濟師戮力扶義天步乃夷奄有滎波遂荒鄭封帝曰
俞往汝作共工澤流於家慶積恩重門羅軒蓋賜有歌
鐘再謫湘源謂當後笑遂遊岱宗天實不弔寂寞舊館
淒涼江徼塚石泉戶摘其光曜

唐故朝散大夫中書舍人秘書少監頓丘李公

墓誌

公諱誠字玄成魏郡頓丘人也九代祖誕魏太傅陳留
郡王從太傅七葉生左威衛將軍翊威衛生汾州長史
昇長史生濮陽令諒濮陽生公四歲知禮七歲善屬文
十六戶部尚書姚珽以賢良薦比之終賈開元三年舉
進士十年舉茂才十七年舉文學皆射策取甲科由太
平尉為金吾曹監察御史河南司錄美原令膳部員外
郎考功員外郎天寶元年考功郎中知制誥修國史二
年中書舍人五載祕書少監七載十二月終於京師自

初仕至終二十七年歷官十享壽五十三動靜由禮交
不諂瀆弘毅貞亮直而不肆居官必忠執事必敬未嘗
以悔吝改操為權倖屈法由是自御史為河南府司錄
持正不阿故也宰美陽周月收案大猾除其根株然後
布政及暮而美陽無訟乃有涸泉湧流白雀馴於庭開
元中蠻夷來格天下無事搢紳聞達之路唯文章先公
以俊造文賦皆第一京師人傳寫策藁相示以為式無
何司言載筆乃典祕書公才盛名與職位俱論者謂公

以文學政事取名器如拾芥雖不至公卿其令聞令望足遺後昆夫人孝義縣君宋氏萊州司馬元同之女禮樂風操家之範也柔明孝慈天之質也清淨厭離修之惠也能修采蘋之職以正家節李氏之閨門肅九族睦實夫人是賴乾元元年隨長女從夫子洋州二年正月二十五日終於某居享年五十七遂權窆焉路難不克反葬故也有才子二人曰興曰殷悉能荷先大夫之德興三十為左補闕起居舍人殷舉秀才甲科永泰二年

興請命於上迎夫人喪至自洋州十月二十七日合祔於澠池先塋夫惟天地能長且久若丘隴陵谷則無不遷者也故纂其先人之景行勒於石以為誌

唐故給事中贈吏部侍郎蕭公墓誌銘

并序

公諱直字正仲梁長沙王懿七代孫有唐御史中丞臨汝郡守諒之孟子聰秀英達忠敏孝敬志強體和才方而圓果於從政當斷不惑有妙用明識足以濟衆利物與朋友然諾見於一貴一賤之際十歲能屬文工書十

二遊上庠十七舉明經上第名冠太學二十餘以書記
參朔方軍事中丞府君之遇讒謫居也公亦播遷漢東
移尉穀熟至德二年乃由廷尉評授監察御史厯河南
府戶曹京兆府司錄參軍其後驟升尚書戶部庫部司
勳吏部四曹郎自殿中進兼侍御史中丞徐州刺史廣
德元年中一歲四遷更七職朝廷難奉使之選謂非公
莫可故也永泰元年拜太子左庶子大厯三年授給事
中前後居官二十辟書記支使判官副使行軍司馬貳

使臣之車者八出入冠柱後惠文冠者六所從之主則
朔方元帥張懷欽汴州刺史李彥允揚州刺史李成式
戶部尚書李公峘故相國今戶部侍郎第五公琦今相
國黃門侍郎王公縉中書侍郎元公載其人也當乾元
上元中大憝未靖王室之安危惟方面藩鎮是瞻公所
佐之府必以忠力主畫疑謀危事談笑而決刀筆之所
加應機成務談者稱其多才初公居先公夫人之喪外
除猶毀其後母弟立卒公暮不絕哭再暮不懸樂食不

肉談者高其孝友人緩急小大之請必儲必副內姻外
姻與所知之喪必匍匐而救之贈嗆加於人一等談者
服其仁愛為庶子給事黃門出入兩宮優游三公間皆
得其歡心方謂六卿九伯之位可坐而拾命不我與天
孤人望歲在丁酉二月二日終於靜安里正寢春秋四
十六談者歎其名與位與才與時四者皆并獨壽不至
時輩以為痛三月二十五日詔贈吏部侍郎嗣子策密
呂羸然銜哀奉喪來歸冬十月甲午卜葬於洛陽龍門

岡先中丞瑩之左禮也先其期論譔功烈以墓銘乞其
父友孝也余欲塞其孝思之誠故錄其實不華其文銘
曰

天地氣和靈芝吐葩德善下鍾才子承家為言為行是
構是荷平聲天子謂公濟美忠文駱馬鐵冠俾佐使臣周

爰海隅撫循斯民往踐諸曹亦倅戎車一麾出守言隼
其旗乃推銅樓復登明廬竹花梧葉樓食茲始曷云不
淑今也遙已萬里可到中途而止逝者如斯化往莫留

瑤林瓊樹零落山丘匪石之貞曷紀德休

唐故銀青光祿大夫太子左庶子嚴公墓誌銘

并序

皇唐太子左庶子河內縣子馮翊嚴公諱損之故都督
洮州諸軍事洮州刺史協之孫贈太常少卿方約季子
中書侍郎挺之母弟家之慶天之休鍾於公躬故德備
少仕昌世遇權臣惡直官不登三臺晚值多難安貞不
競故位不過郡守宮尹前後佐兩衛參四府領二縣典

七州再入石渠三升龍樓凡處任十八享年七十六未嘗以利苟合違道從欲用之則行見幾不俟動靜允迪勞謙有光廣德二年六月二十五日終於襄陽是歲八月權寔楚山西原冢子曰式官至江漢少尹不幸道夭仲子曰士元由殿中侍御史為尚書虞部郎少子曰士良領秘書著作悉能裕父懿懿文德取公器他日獨立訓所至也大歷三年歲在戊申五月二十九日返葬於洛陽先塋禮之至者宗人故太常卿向嘗狀公往行貽諸

有司謂公外寬內剛廉正篤敬溫而不厲直而不訐學
究原本行有枝葉故其適道求友莅職任事覈其實不
居其華初公宰汜水也以莊明慈惠為政汜水人不敢
欺而戶口增倍獄訟衰止御史中丞蕭隱之以狀聞公
是以有著作郎之拜其後歷太原上谷弋陽餘杭丹陽
雖風俗殊異治效如一不曰才乎公在清池會安祿山
與當國者交惡公曰難作矣遂移疾請告姦黨惡之是
以有弋陽之貶貶之明年河北為戎不曰智乎涉艱患

不辱身踐祿位不徇名居義處順動罔違吉不曰貞乎
嗚呼榮聞素業與時偕逝可稱也而不可追也今採其
實錄刻石示後蓋欲報罔極者之志云其詞曰

君子之道容民畜衆公宰二邑二邑無訟與國共此惟
二千石公七剖竹七著成績乃司國子司成望苑考藝
校德以弼三善中和其心正直是踐道亞羽翼名掩春
華忠以事君孝施於家聚聚令子鮮侔晨葩若何不弔
盛德既喪奇徽永沫士友孤望千載九原遊者悽愴

唐故尚書庫部郎中滎陽鄭公墓誌銘 并序

永泰元年六月四日尚書庫部郎中鄭公卒春秋四十
有九知舊茹痛行路嗟悼謂公口無擇言身無擇行得
乾之貞固損之元吉坎之常德明夷之正志宜荷福履俾
如山阜而秩止於三百石年不及知天命明神豈予欺
乎嗣子正藐然始孩孤窮何怙八月四日葬於先塋宗
人家老於是乎以果行實錄貴於豐石禮也公諱寵字
若驚滎陽開封人也其先建國命氏有鄭世家言之矣

大王父某澧州司馬贈衛州刺史衛州生襄陽令某襄陽生臨汾令某臨汾生郎中純懿休祉之所叢也貞亮忠厚仁讓孝敬融明而溫性與道併二十舉明經高第解褐鄴尉大尉房公之由鄴郡而為右扶風也表公茂材擢號縣令號土狹而人窳公用教化漬之謂任力不及任人聽訟不及使無訟故以直弘道以信齊政以禮肅墮以讓息競莅止一歲號人恥格至德二年拜監察御史徙太原戶曹領平遙令真拜太谷其在晉如在號

也詔書勞之錫以命服遷華原令拜尚書工部員外郎而唐人晉人猶歌詠盛德願得公常居其邦莫有由也太原守上其狀詔遷太原少尹未行轉庫部郎中凡厯十官宰四縣一持斧而再起草其政先道德而後刑法內精辯而外若訥戮力事上吐誠率下罔曲物以直已罔拂百姓以干名聲唯畏清之知善之彰飲其教者忻然樂康而不知其惠之所由生也與公遊者靡覩靡踈悉飽醇德而莫見其天機之弛張也其學而知者唯濟

南之書淹中之禮田何之易胡毋之春秋酌其微言以治其身身之治移於閨門閨門之治移於官官之治可移於國而壽不可踰於域故位量未半良史無述焉自古有死彭殤同途獨有其身歿而其名存乎故老之口此之謂不朽不可以不誌其詞曰

剛德干時道家所忌抑抑鄭公直溫柔殺衆人缺缺鄭公見朴衆人昭昭鄭公若濁布政四邑四邑和樂雷震風偃物亦允若御史執法郎官草奏鄭公莅止德音是

茂於以經術潤色王度宗族叙惇鄉黨歸仁孝謹之風
萬石之門凡也弟也天天申申善則無報天地不仁抑
抑鄭公執德之中生不近其名歿不墮其聲吁嗟乎鄭
公

唐故吏部郎中贈給事中韋公墓誌銘

并序

郎中諱元魯字穎叔司農少卿德敏之孫衢州刺史魯
縣康公璆之子天寶五載解褐尉邠州新平其後參佐
使臣者五入御史府者三一居專城六為尚書郎大厯

二年十二月乙酉以吏部郎中終於京師靜恭里之故宅春秋五十有五啟手足之日朋從僚吏親者疏者匍匐雨泣奔之如不及惟郎中寬靜博厚孝友貞儉樸而愿達而好禮氣和於中而博之以文好惡嗜欲發皆中節以誠待人不務智巧雅尚儉慎臨事則虛已應物與道弛張性若疎緩赴急則慘怛之仁形於顛沛誦詩三百不以文自衒在官必聞未嘗近名尤樂閒曠每以丘壑為已任機事撓之而未遑也則公之歿也跡負其志

壽違其德官屈其量君子以是三者思其人而哀其命
公無肩子以兄子某為嗣大厯三年正月癸酉卜窆於
舊塋初執事者議三府高選欲以給事黃門待公既而
弗及僉以為恨至是詔贈給事中以褒美之且復其言
也嗚呼渭水東注時與之俱音容緬然何嗟及矣公之
從父兄曰元甫與公友愛之外有知己之道焉故天倫
之戚加於人一等謂及忝仲氏之舊故使為誌云

言罕兼德勇不必仁文行忠信獨鍾於身凡厥正人既

富方穀子叶於極命故不淑結志方遠為郎未老孰與
若木先秋而槁變化誰宰天地何物目不容瞬盛德若
失昨日容徽今如夢焉採君遺塵誌君新阡

唐故河南府法曹參軍張公墓表

有唐逸士吳郡張從師沖和純粹辯博宏達卓犖好古
儻蕩逸羣言不近名唯代耕是謀貞不絕俗以忘機為
心秀才高第起家臨濮縣尉歷馮翊伊闕二縣主簿乾
元年拜監察御史中丞鄭昞之擁旄濟江辟為從事轉

河南府法曹參軍凡歷官五政享年五十有八志懷樂道終始以之攘臂於爵祿聲利得喪虧盈之間如浮雲無心野鶴獨立形全神全身與化俱上元二年八月辛卯終於吳郡私第其孤惟儉惟靜能稟謬訓弱歲皆精左氏穀梁春秋藐爾在疚零丁何恃季弟秘書省正字曰從申迺茹天倫之哀謀及卜筮以是歲九月二十八日權窆於虎丘山之西原禮也初公祖損之隋大業中進士甲科位至侍御史尚書水部郎損之生烈考滋以

碩學麗藻名動京師亦舉進士自監察御史為會稽令
文雅之慶施於後昆故擢秀才而衣繡衣者及公三葉
君子以為榮少好黃老且修禪慧晚節持六經微言以
遺三子三聖之學不墜於地君子以為博詆諧不羈頡
頏傲世視軒冕纓紱如塵埃必也臨事能斷義形於色
推賢舉善不進不止君子以為達當伊川啓戎厯陽為
魚公力窘身陷者至於再涵泳鼎沸厲揭橫流而迹無
緇磷憂患不能及君子以為智宜享黃髮而升青雲天

胡降凶殲我仁人嗚呼先生往無返期談藪清風詞林
逸韻墨池真草三事永絕凡今友朋可勝痛哉恐後代
丘隴將平川澤相失求遺跡者莫知德音之所始乃志
之以石永為靈表

毘陵集卷十一

欽定四庫全書

毘陵集卷十二

唐 獨孤及 撰

墓誌下

十一首

唐故右金吾衛將軍河南閻公墓誌銘

并序

唐故范陽郡倉曹參軍京兆韋公墓誌銘

并序

唐故商州錄事參軍鄭府君墓誌銘

并序

唐故號州弘農縣令天水趙府君墓誌

唐故衢州司士參軍李府君墓誌銘

并序

唐太府少卿兼萬州刺史賀若公故夫人河南

元氏墓誌銘

并序

唐新平長公主季女姜氏墓誌銘

并序

唐前楚州司馬河南獨孤公故夫人博陵崔氏

墓誌銘

并序

唐司直博陵崔公故夫人趙郡李氏墓誌銘

并序

唐萬年縣尉崔肅洌故妻李氏墓誌銘

并序

唐故天水趙琚墓誌銘

并序

墓誌

唐故右金吾衛將軍河南閻公墓誌銘

并序

公諱用之遠祖曰文周昭王瑕之昭也生而手有文曰閻康王奇之命封閻城文四十五代孫滿仕後魏太祖為諸曹大夫自馬邑家河南其裔孫慶在隋為少司空慶生毘毘生立本立德唐永徽中立本為中書令立德為工部尚書立德生玄邃以司空尚書之餘裕也官至澤

州刺史遂生巨源嘗宰射洪有仁政射洪人詠歌之公射洪第二子也溫毅遜直廉恪寬信讀論語老子周易被服其教初仕彭州參軍嘗攝督郵一日糾按本州僣謬不法數十事太守徐知人以為材後有詔擇舍人以公魁偉爽晤有醞藉乃登其選會戎侵我天子方愛人息戰將以辭讓屈之詔公使西域以王命喻禍福戎人頓首請罪介馬不汗戈鋌不用而戎軍却遷右衛郎將知引駕仗金吾將軍李質上殿不解佩刀公呵下殿陛

請按以法左右皆震悚自是環衛加肅先是有司以三衛執扇登殿引蹕公奏曰三衛皆趨悍有材力不當升階陞通衛座請以宦者代上曰可遂為故事天寶二年冊拜公長女為皇子義王玳妃加公左驍衛將軍遷榮王傳初玄宗懲諸侯王之國任事率多驕蹇不奉法度而人受其害故開元之後皇子皇孫雖荷封建之命未嘗離阿保之手悉無出宮閣任卿大夫者公以為王居深宮則傳相職廢上疏陳古義謁請諸王申輔導之禮

議雖廢格上以為忠公以白首位為將軍諸侯傳太夫人尚無恙以銀印赤韍侍朝夕膳色難無違時人榮之太夫人捐館舍禮五十不毀公泣血死孝既免喪天子復因以端士俾傳壽王加朝散大夫上幸溫泉經時未還宮京師人望屬車咸懷怨思公獻四言詩十二章諷諫優詔褒歎後遷左金吾將軍天寶十五載二京覆沒公為戎所獲明年戎師奔然後以初服秋歸至德後二年十二月終于京師春秋五十九夫人雍州司倉參

軍博陵崔眷言之女專靜沖懿慈惠而明用德禮以佐
君子有古風烈亦天鍾其仁不遠其算年若干月日歿
於私第歿六載而公薨俱權窆少陵原有四子寧寀宰
宣以家之不造世故之無寧歲也銜恤茹血不克襄事
者九載廣德中寀以監察御史領高陵令明年辭職始
卜葬於故原吉乃歲在丙午十一月日遷兆合祔焉嗚
呼惟音形事業悉如化往獨陳迹與丘墓存焉非金石
則無以示久遠故表而銘之孝子之志也其辭云

郁郁金吾洵美且溫事君之忠資於愛親以德資身其
祉宜繁彼美輔佐儀刑閨門禮樂是悅孝慈是敦百歲
之後合德九原獨以令軌垂諸後昆

唐故范陽郡倉曹參軍京兆韋公墓誌銘

并序

永泰二年五月七日有唐故衢州刺史魯縣子京兆韋
璆第三子范陽郡倉曹參軍諱元誠葬於少陵原先塋
夫人范陽盧氏祔焉從周禮也公少時為坊州參軍歷
襄州司法試守棗陽縣令真授蒙城令凡五遷至范陽

倉曹初安祿山以范陽叛劫脅元元以殺整衆士之因
官因居而困窘顛躓墮圍中者數千計凶威所及不死
則汚公掾吏也在偽署伍中溷跡佯狂冀以病免盜憎
之乃加害焉春秋若干夫陽九會厄天地鞠凶燎火炎
炎玉石何訴是歲天寶十五載也嗚呼人皆筮仕必以
廉平公幹稱於州里人誰無死死則名不辱志不奪不
噉盜哺以易其生生且不苟其事君事親之禮不待史
氏而自明矣在官必聞則居家正身與朋友臨財之節

可知矣有子曰彤龍鍾崎嶇於阻險之中十年不克返
葬哀有何極歲在乙巳冬某月始跋涉太行恒山之路
以公之喪至自某郡公季弟吏部郎中元曾既得吉卜
痛天倫之懽莫之追也願以兄之忠於君恪於官友於
家之德之美以播後嗣庶幾陵岸遷而德音不磨謬以
及為習於禮者故使為志其辭曰

天地橫隤三象霾兮梟獍擇肉驚驚懼兮明夷於飛罹
其故兮美玉寧折質不污兮子子孫孫荷餘裕兮

唐故商州錄事參軍鄭府君墓誌銘

并序

公諱密字慎微滎陽開封人也初韓哀侯滅鄭羣公子
奔陳宋間始以國為氏惟桓公武公之德盛故國除而
其姓彌大歷漢魏晉迄於今冠冕婚姻世莫與京公其
裔也齊中書監南充州刺史諡曰平諱述祖公之六代
祖國朝衛州刺史府君諱某公之大王父也博州刺史
府君諱某晉州臨汾令贈太常少卿府君諱某公之祖
禰也公貞方介直勤而愛人初仕趙州栢鄉尉所莅不

過一扁而政行一邑廉使省風俗至趙趙父老率吏人
數千遮道稱公之能識者躋公材且得衆滿歲歸洛陽
家於鳴皋山南趣深險以避安祿山之難親故數百家
攜老幼往依之公悉發實窖無親疎皆仰給餓者窖者
得公全活先是累歲力耕致粟至千斛至是而盡談者
稱公之義二京返正天子選賢守相令長將蘇瘡痍之
人殿中侍御史王政以公充賦拜商州洛南令數月訟
平賦均監察御史李栢殿中侍御史王延昌御史中丞

元公載並表言其狀詔書褒稱加公壽王府戶曹參軍
洛南如故無何遷上津令專知轉運水陸漕輓邦都移
用賴公而濟徙大理評事商州刺史盧浦以公前後課
績條奏遂以本官兼商州錄事參軍御史中丞王延昌
表公才任御史奏未下會疾終於位春秋五十是歲廣
德元年八月七日也其年權寔於商州夫人清河崔氏
某之女生子雅弟幹大厯九年歲次甲寅十一月某日
返葬於洛陽北邙山某原禮也公世業尚文伯仲皆才

公尤深於詩言合麗則究緣情之美天性孝悌檢身端
方居官廉恪其家道足以勸所不至者位止於中士壽
不過知天命矣夫公母弟尚書刑部郎中宣秘書省
著作郎寶以其兄之德善授續於及及跪讀三復敢以
實錄刻石其詞曰

緇衣之宜敝予改為蔚彼明德蔭此本枝乃公乃侯典
則是貽藪祉於公實生今儀試吏栢仁巍然忠規清不
奪節剛不干時以道蒙難處險若夷臨財務施依者如

歸匪愛千鍾仁為吾師亂已運開乃從縶維先禮後刑
以牧乳嬰商於之人家肥俗移督郵廷評九仞之資曷
云不淑命天功虧明畧未申詒痛所知吉凶匪忱令古
同悲桐鄉之愛懷縣之詩令問顯顯子孫承之

唐故號州弘農縣令天水趙府君墓誌

府君諱令則字某天水人也其先造父實佐周穆有平
徐偃王之勲因封命氏至晉而大以成季宣孟之慶故
家化為國及武靈而稱王語在太史公趙世家秦滅諸

侯使趙王嘉子公輔主西戎戎人懷之子孫因家隴西
世為天水著姓其源遠矣曾祖元楷隋殿中監工部尚
書淮安公祖崇基國朝岐州郿縣令符璽郎右衛長史
烈考慶逸正議大夫許州長史府君長史第二子也好
古博學涉獵百家之言善屬文尤注意詩賦外剛毅峭
直內溫良而仁率由天性果於行已起家幽州薊縣尉
敏洽強濟聞於河朔以直道事人忤幽州刺史張守珪
貶封州開建縣尉遇赦遷建州建安縣丞稍移湖州安

吉縣丞天寶九載選授虢州弘農縣令弘農甸服也地
邇賦殷號為難治府君治之如治家刑以肅淫怠德以
哀鰥寡為政期年邑民知方三歲績成人無不均不安
之患號人頌之解龜後貧無餘資因遊方河朔會天寶
十五載幽都為戎薦瘞鍾運明夷垂翼至德二載某月
日遇疾終于某州春秋若干嗚呼民莫不穀我獨百罹
才如府君胡不朋三壽綏百祿而生世坎壈歿身喪亂
若之何不弔命矣夫夫人河南獨孤氏朝請大夫汝南

郡長史府君之孫武功縣丞府君之女明哲柔懿實天生德結悅宜室四十有四載內修法度輔佐君子躬勤慈儉以化閨門趙氏之家肥族睦繫夫人是賴有子若干人訓以義方咸能被服文藝幹父之蠱使有德者必壽夫人宜登期頤奈何不淑遽奪長算天實不信人烏徵福大厯十年五月二日寢疾終于郿縣官舍春秋六十有七嗚呼哀哉長子湖州安吉縣丞琪琪弟某官璿蘇州嘉興縣丞璿太子舍人兼京兆府郿縣令玕晉州

臨汾縣尉珮臨晉縣尉珣珣弟玘是歲秋八月某日奉
府君夫人之喪合祔於京兆某原禮也府君有集若干
卷遐遠之志見於詞矣若言行才業官族歲月非銘無
以示後裔也故著於石

唐故衢州司士參軍李府君墓誌銘

并序

公諱濤皇唐太祖景皇帝六代孫也曾祖道立嘗典陝
濟陳二州刺史封高平郡王祖景淑畢國公父仲康官
至尚書主客郎中楚州刺史世秉懿德為公族領袖語

在皇室譜公純孝忠厚貞信廉讓直而遜明而晦朴而不固靜而應物克己復禮時然後言策名居官清畏人知弱歲好學篤志經術專戴氏禮晚節耽太史公書酌百代之典故以輔儒道以經明行修宗正寺舉第一初仕許州臨潁縣主簿歷宋州宋城縣尉皆以恭寬信惠聞於千室議黜陟幽明者謂公文行吏事宜登三臺會河朔軍興避地江表相國崔渙承詔署衡州司士參軍於時五府辟召之權移於兵間務苟進者多由選而致

顯位公儉德正志安貞俟時未嘗以得喪夷險蒂芥方寸視榮辱晏如也論者高之乾元二年某月日寢疾終於揚州春秋若干某月日權窆於衡州嗚呼人可以師表搢紳而無貴仕禮可以軌範風俗而不遐壽沖用休績卷而未形謚與化往使善人相弔嗚呼哀哉公歿後十有二載從父弟涵以宗室柱石為御史大夫按節江東時痛仁兄生不登公侯卿大夫之位歿不備踰月外姻至之禮遂茹哀筮日減月俸以庀喪具由是大厯九

年夏四月二十七日公長子居介及居佐居敬居易奉
公之輅柩歸葬於洛陽先使君夫人宅兆之側凡令孝
乎唯孝友於兄弟者於此乎觀禮及謂知公者宜莫若
懿親今將以無媿之詞申報幽路故作銘以紀於石其
詞曰

天地方否君子安卑世道既夷隙駒莫追仁而不壽才
既無施積善必慶天何余欺襜褕裳帷沂江絕淮蒼蒼
故山玉樹斯埋死喪之威弟兄孔懷令德家風與天壤

偕

唐太府少卿兼萬州刺史賀若公故夫人河南

郡君元氏墓誌銘并序

夫人諱某魏景穆皇帝九代孫也祖諱某皇朝贈太子
少保父諱某克荷前烈不幸早世夫人在孕而孤鞠育
於叔父相國潁川公天機聰明生知仁孝被服法度綜
習文史年十四嫁河南賀若璿璿積功勞剖符為郡夫
人輔佐以副笄宜室睦其族且勸以義而風藻禮範

儀刑閨門晚節厭離心垢嚴持禪誦而道機未弘壽量有極永泰元年三月某日終於渠州享年若干嗚呼以夫人之柔明孝慈溫惠淑茂況承景穆之餘裕少保之貽則季父當國良人專城河潤澤及福綏宜遠胡弗眉壽鍾是短歷潁川公之慟其可既乎大歷二年二月二十日反葬於京兆鄠縣之某原宜列景行詒於彤史恐陵岸或遷音徽將沫故月而日之銘諸堅石蓋猶父之志也其詞曰

人亦有言天祚明德於嗟邦媛未階壽域家節既成蕙
芽方植仁而無報為善者惑夜臺超忽神斯冥默貞石
有磷德音罔極

唐新平長公主故季女姜氏墓誌銘

并序

乙巳歲四月二十六日有唐新平長公主季女姜氏卒
於京師昊天觀五月六日葬於某原長公主數季女姿
度榮茂溫惠淑慎能循女師之訓動中禮範其曾祖柔
遠位至尚書地官侍郎祖皎以勲舊厯太常秘書剖符

封楚其父慶初能踐修祖考之耿光嗣爵舊國復居太
常玄宗其外王父也肅宗其舅也天池波瀾澤潤本根
謂德鍾下錫祉與壽宜君子家室且貽芳於彤管乃未
筭而天命也夫嗚呼窮窶專柔含德而未形雖當鵲巢
小星采蘋殷雷之德今已矣夫史氏茂由記之矣長公
主之慟其庸可及乎故月而日之銘諸堅石其詞曰
思嬖季女生於公族稟懿德兮天世其祿不遐其福胡
不淑兮彭殤同躅數不可續哀靡極兮

唐前楚州司馬河南獨孤公故夫人博陵崔氏

墓誌銘并序

夫人諱某博陵安平人也曾祖恭禮國朝駙馬都尉延
齊易州三刺史封博陵郡男祖興宗饒州長史考雋毫
州臨渙縣丞夫人少孤在家以純孝稱既笄莊明而賢
柔順有識年若干歸於獨孤氏奉蘋藻供祭祀事長撫
幼糺合宗族敬恭而誠孝愛備至動必由禮非法度未
嘗踐也生子四人教之以義方夙夜貞厲家道以正婦

如服其義親戚稱其慈天不降衷於我大厯八年十一月某日享年若干歿於壽州少長行哭六姻涕泗傷夫
人有宜室之美勸義之明而司命奪其長算使德與壽
反嗚呼哀哉明年十一月日公使長男勣奉夫人之喪
返葬京師某原先塋之側禮也刊石以誌庶德不朽其
銘曰

夫人之德柔明淑慎從夫以禮承筐以順奉若家節率
由彛訓遐福是期溘至何迅謂仁者壽天實不信同塵

彭殤歸根大運於以刊石永播淑問

唐司直博陵崔氏故夫人趙郡李氏墓誌銘

并序

夫人諱某趙郡人也皇朝德州將陵縣令鉅之長女天生柔懿齠齔知禮年十六歸於崔氏丕承宗祀虔恭中饋謙敬恭儉貞固淑溫閨門化之宗族以睦生一子年十一而殤有女四人長女夭於襁褓次女適范陽盧履純第三女適河南獨孤及年若干早世少女適樂安將鎮皆柔明好禮淑慎有德循度勸義雖造次不違仁實

夫人之教訓也輔佐君子三十有九年夙夜靡違家道以正向使神祐正直天報德善宜登期願與君子偕老嗚呼不造春秋五十四而歿凡所顧復大半道天撒琴瑟之日無兒主祭德興事及哀有何極嗚呼哀哉是歲十月某日卜宅兆於某山某原追紀往行以志幽石禮也及忝婚姻之故嘗瞻清懿逝歿相尋報德靡及敢不備書實錄期於不朽其詞云

莊敬柔順婦行之極抑抑夫人秉是懿德衿鞶為戒蘋

藻惟職四始之美六姻是式仁而必報當躋壽域天寶
匪忱古今同惑變化忽悅音徽冥默闢右遺範是效是
則

唐萬年縣尉崔肅洌故妻李氏墓誌銘

并序

夫人其先隴西人也皇唐高平郡王道立之玄孫畢國
公景淑曾孫祖仲康開元中為尚書主客郎中楚州刺
史父濤以貞信篤行為宗室冠冕歷宋城尉衢州司士
參軍而歿德重而行不稱啟手足之日為守道者所痛

夫人吾之姊子也稟氣於家君之中和母氏之柔明故
姿度淑茂恭儉順天性孝慈聰慧有識讀書善鼓琴
造次必以禮自持莫見其喜怒之容言歸於崔以德宜
夫事姑禮節儀刑閨梱輔佐之美六姻是瞻有識者謂
當有鵲巢之貴鮒背之壽天則反是使春秋二十七而
終醫不至歟命有極而然歟適來適去皆忽然歟吾痛
且惑傷悼之不足故形於文且遂為志其文曰

爾德爾容天實爾鍾爾志爾年天胡不從勸義孤望歸

安跡絕哀哀母氏泣盡繼血刻字此石紀爾芳烈

唐故天水趙琚墓誌銘

并序

琚字遙憐弘農令府君第五子厥生之初會府君先有封州之役契闊萬里愛而不見故遙以字之太夫人顧之復之訓視加等及長溫厚孝謹文敏好學美姿儀有材藝戊戌歲十月以擲縱筭總從府君涉河十一月卒於深州嗚呼未婚未祿夭折是絕不見其成六姻所痛大厯五年八月某日葬於洛陽先府君塋之次禮也其

銘曰

彭氏殤子其壽未易數子之往死生艱蹟末如之何刻

石以記

毘陵集卷十二

欽定四庫全書

毘陵集卷十三

唐 獨孤及 撰

集序 三首

檢校尚書吏部員外郎趙郡李公中集序

唐故左補闕安定皇甫公集序

唐故殿中侍御史贈考功郎中蕭府君文章集

錄序

讚 六首

蘇州刺史兼御史大夫襄武李公寫真圖讚

尚書右丞徐公寫真圖讚

并序

楊起居畫古松樹讚

張侍御寫真圖讚

佛頂尊勝陀羅尼幢讚

并序

觀世音菩薩等身繡像讚

并序

集序 三首

檢校尚書吏部員外郎趙郡李公中集序

志非言不形言非文不彰是三者相為用亦猶涉川者
假舟楫而後濟自典謨缺雅頌寢世道陵夷文亦下衰
故作者往往先文字後比興其風流蕩而不返乃至有
飾其辭而遺其意者則潤色愈工其實愈喪及其大壞
也儷偶章句使枝對葉比以八病四聲為拈拳拳拳守
之如奉法令聞臯繇史克之作則呶然笑之天下雷同
風驅雲趨文不足言言不足志亦猶木蘭為舟翠羽為

檄翫之於陸而無涉川之用痛乎流俗之惑人也舊矣
帝唐以文德敷祐于下民被王風俗稍丕變至則天太
后時陳子昂以雅易鄭圓者浸而嚮方天寶中公與蘭
陵蕭茂挺長樂賈幼幾勃焉復起振中古之風以弘文
德公之作本乎王道大抵以五經為泉源抒情性以託
諷然後有歌詠美教化獻箴諫然後有賦頌懸權衡以
辨天下公是然後有論議至若記叙編錄銘鼎刻石之
作必採其行事以正褒貶非夫子之旨不書故風雅之

指歸刑政之本根忠孝之大倫皆見於詞於時文士馳
驚颺扇波委二十年間學者稍厭折揚黃華而窺咸池
之音者什五六識者謂之文章中興公實啟之公名華
字遐叔趙郡人安邑令府君第三子質直而和純固而
明曠達而有節中行而能斷孝敬忠廉根於天機執親
之喪哀達神明其任職釐績外若坦蕩而內持正性諫
不犯顏見義乃勇舉善唯懼不及務去惡如復讐與朋
友交然諾著於天下其偉詞麗藻則和氣之餘也學博

而識有餘才多而體愈迅每述作則筆鋒風生聽者耳駭
開元二十三年舉進士天寶二年舉博學宏詞皆為科
首由南和尉權秘書省校書郎八年歷伊闕尉當斯時
唐興百三十餘年天下一家朝廷尚丈夫羿工乎中微拙
於使人無已譽公才與時并故不近名而名彰時輩歸
望如鱗羽之於虬鸞也十一年拜監察御史會權臣竊
柄貪猾當路公入司方書出按二千石持斧所嚮郡邑
為肅為奸黨所嫉不容於御史府除右補闕祿山之難

方命圯族者蔽天聰明勇者不得奮明者不得謀公危
行正詞獻納以誠累陳誅尤渠完封疆之策闢犬迎吠
故書留下時繼太夫人在鄴初潼關敗書聞或勸公
走蜀詣行在所公曰奈方寸何不若間行問安否然後
輦母安輿而逃謀未果為盜所獲二京既復坐謫杭州
司功參軍太夫人棄敬養公自傷悼以事君故踐危亂
而不能安親既受汙非其疾而貽親之憂及隨牒願終
養而遭天不弔由是銜罔極之痛者三故雖除喪抱終

身之戚焉謂志已虧息陳力之願焉因屏居江南省躬
遺名誓心自絕無何詔復授左補闕又加尚書司封員
外郎璽書連徵公卿已下傾首延佇至止之日將以司
言處公公曰焉有隳節辱志者可以荷君之寵乎遂移
疾請告故相國李公峴之領選江南也表為從事加檢
校吏部郎中明年遇風痺徙家於楚州疾痛貧甚課子
弟力農圃賸衣食雅好修無生法以冥寂思慮視爵
祿形骸與遺土同唯吳楚之士君子謨家傳修墓版及

郡邑頌賢守宰功德者靡不賫貨幣越江湖求文於公
得請者以為子孫榮公遇勝日時復綴錄以應其求過
是而往不復著書少時所著者多散落人間名存而篇
亡自監察御史已後所作頌賦詩歌碑表叙論誌記贊
祭凡一百四十三篇公長子羔字宗緒編為二十卷號
中集其中陳王業則無疆頌主文而謫諫則言鑒含元
殿賦敦禮教則哀節婦賦靈武二孝讚表賢達盛德則
崔賓客集序元魯山碣房太尉德政碑平原張公頌梁

國李公傳德先生誄權著作墓誌李夫人傳盧夫人頌
一死一生之間抒其交情則祭蕭功曹劉評事張評事
文吟詠情性達於事變則詠古詩思舊則三賢論辨卿
大夫之族姓則盧監察神道碑自叙則別相里造范
倫序詮佛教心要而合其異同則南泉真禪師左溪郎
禪師碑其餘雖波瀾萬變而未始不根於典謨故覽公
之文知公之質不俟覲容貌聽詞氣假令束帶立於史
臣之位足以潤色王度天而病之時不幸歟公之病也

嘗以斯文見託詒其書曰桓譚論揚雄當有身後名華亦謂足下一桓譚也及於公才宜播其述作之美明於後人故拜命之辱而不讓今著其文德冠於篇首焉

唐故左補闕安定皇甫公集序

五言詩之源生於國風廣於離騷著於李蘇盛於曹劉其所自遠矣當漢魏之間雖已朴散為器作者猶質有餘而文不足以今揆昔則有朱絃疎越太羹遺味之歎歷千餘歲至沈詹事宋考功始財成六律彰施五色使

言之而中倫歌之而成聲緣情綺靡之功至是乃備雖
去雅浸遠其麗有過於古者亦猶路黻出於土鼓篆籀
生於鳥跡也沈宋既歿而崔司勳顥王右丞維復崛起
於開元天寶之間得其門而入者當代不過數人補闕
其一人也補闕諱冉字茂政玄晏先生之後銀青光祿
大夫澤州刺史諱敬德之曾孫朝散大夫饒州樂平縣
令諱价之孫中散大夫潭州刺史諱顥之子十歲能屬
文十五歲而老成右丞相曲江張公深所歎異謂清穎

秀拔有江徐之風伯父秘書少監彬尤器之自是令問
休暢舉進士第一歷無錫縣尉左金吾兵曹令相國太
原公之推轂河南也辟為書記大厯二年遷左拾遺轉
右補闕奉使江表因省家至丹陽朝廷虛三署郎位以
待君之復不幸短命年方五十四而歿嗚呼惜哉君忠
恕廉恪居官可紀孝友恭讓自內形外言必依仁交不
苟合得喪喜愠罕見於容故覩君述作知君所尚以景
命不永斯文未臻其極也蓋存於遺札者凡三百有五

十篇其詩大略以古之比興就今之聲律涵詠風騷憲章顏謝至若麗曲感動逸思奔發則天機獨得非師資所獎每舞雩詠歸或金谷文會曲水修禊南浦愴別新意秀句輒加於常時一等才鍾於情故也君母弟殿中侍御史曾字孝常與君同稟學詩之訓君有誨誘之助焉既而麗藻競爽盛名相亞同乎聲者方之景陽孟陽孝常既除喪懼遺製之墜於地也以及與茂政前後為諫官故銜痛編次以論譔見託遂著其始終以冠於篇

唐故殿中侍御史贈考功郎中蕭府君文章集

錄序

足志者言足言者文情動於中而形於聲文之徵也梁
於歌頌暢於事業文之著也君子修其詞立其誠生以
此興弘道歿以述作垂裕此之謂不朽侍御諱立南蘭
陵人也御史中丞汝州刺史府君之仲子奕世純嘏及
公始大襁褓克岐十五而立神靜氣和才與道并孝悌
忠信以為己任行有餘力故幼而學文嘗謂揚馬言大

而迂屈宋詞侈而怨恣其流者或文質交喪雅鄭相奪
盡為之中道乎故夫子之文章深其致婉其旨直而不
野麗而不艷天寶元年詔徵賢良方正以備多士公時
年十七射策甲科盛名翕然震謚京邑論者知遠大之
跡自此始也既而在苒宦途遭遇世故厯佐戎幕周旋
江海攸徂之邦必聞其政嘉謨成績藏在諸侯之策既
言中彛倫亦動與古會由是自廷尉評拜監察御史轉
殿中侍御史觀其逐逐利往冥冥翰飛方將乘驚風以騁

驚視青雲如咫尺天道何善而無報與其才而不與其
壽成其器而不成其志命矣夫斯才也而有斯年也公
之元兄尚書庫部員外郎兼侍御史曰某與公俱以文
學政事為臺閣領袖丹穴之雙鳳纔舉棠棣之一花先
落天倫之慟可勝既耶以公瑰姿瑋度利器淑德與東
流皆逝今則已矣可以藏遺芳以示後嗣者其唯夙昔
麗藻平生翰墨乎於是茹痛開緘收血散帙緝其遺札
得詩賦贊論表啟序頌銘誄誌記凡若干篇編為五卷

以為集錄庶幾弔賈生者省鵬集之日問相如者知禪
草猶存云爾

讚

六首

蘇州刺史兼御史大夫襄武李公寫真圖讚

作績精至於藝懸解擬公之德容與化同製獨立正色
神和氣邁婉兮清揚若聞嘉話公綽不欲仲山匪懈形
乎懿範觀者目駭百城仰止羣吏儆戒成務安民亦猶
此畫

尚書右丞徐公寫真圖讚

并序

侍御史韓公至清以學藝書畫之美聞於天下辛丑歲
三月以王事靡盬館於豫章與前尚書右丞徐公同舍
於慧命寺之淨室嘗以暇日裂素灑翰寫畫徐公之容
陳于公之座隅而美目方口和氣秀骨毫釐無差若分
形於鏡入自外者或欲攀跼曲拳俯僂拜謁不知其畫
也衆君子嗟嘆之不足則言以贊其美及亦繼唱於後讚
曰

哲匠運思天姿是具假之筆精實以神遇居然成像豁
若披霧瞻仰神鋒如窺武庫婉婉高識昂昂獨步絕頂
孤松空陂白鷺不犯之色匪躬之故孰知造化亦在毫
素

揚起居畫古松樹讚

道在毫末神凝意注闔然物生千歲古樹龍蟠盤屈精
魅固護霜封雪埋翠幄如故宜構大厦胡為中路豈猶
有待公輸之顧落落貞姿傳之繪素

張侍御寫真圖讚

堂堂乎張洵美且恭執法柱下分形畫工玉立天姿霜
淬神鋒武庫森戟寒山勁松方彈獬豸以佐夔龍他年
雲臺與古同風

佛頂尊勝陀羅尼幢讚

并序

道無形相心離文字非言無以導引故諸法生於假名
非智無以調伏故大音傳於密教茫茫五濁客塵覆之
根識相緣生滅相隨世未有為之牢獄二乘求惠而著

空十地見性而弗了微我智印候誰司南敦如來以大
悲自定之惠力示總持無畏之秘藏雲覆世界雷震羣
有淨除我垢令入法性設字根本假文以筌意也足聲
齒舌因音以見法也以十四音攝一切智雖入無漏而
不捨有為即色以證空也奉之者惡趣固可使開閉黑
業必為之清淨況勝緣乎初太保韓國苗公以兩朝秉
鈞所積廩賜顧命宗子家老曰喪祭之餘以庀功德於
是我相國潁川公將演成公弘誓之果也是以樹因此

幢韓公生代天工德本植焉歿無鬼責蕙芽滋焉而穎
川公猶興哀於絕絃之地將乞靈於無我之法度俾法
雨雨公身田故琢貞石以刊微言仰之贊之如揭日月
烏戲墨點之界有極鐵圍之山有壞唯梵音與法印等
空虛而無窮則公之前際疇可弘度其辭曰

六趣輪轉根塵相及死生變化如響如瞬何用拯溺總
持秘印道網不在弘之者人乃經靈幢公之了因讚持
大力啟迪迷津天魔遁形地獄開門拔箭解縛如日破

昏韓公善根與石長存


觀世音菩薩等身繡像讚

并序

元年建寅月前相州安陽縣令何昌系以是月甲子當受生之辰痛欲報而罔極哀見在之無住顧非大雄之慈法雲之悲則莫能救拯我無明苦果敷祐我弘誓願力乃彰施五色以刺繡成文寫菩薩之真相等觀音之全身於是乎諦觀眸容瞻仰聖位知海潮之梵音不遠蓮花之法座可識將令功德池水溉灌其三業菩提根

芽發生於一雨至哉安陽之樹善也弘矣欲廣其善利
以偈讚云

法雲垂蔭光破黑業五眼周視四魔怖懾以色觀空於
相見法永殖慈緣恒沙億劫



毘陵集卷十三